

Sarajevo, 14.07.2022. godine

Bosna i Hercegovina  
Federacija Bosne i Hercegovine  
**PARLAMENT FEDERACIJE**  
**SARAJEVO**

Jasmina Zubić, zastupnica  
Predstavnički dom Parlamenta Federacije BiH

Primljeno: 21-07-2022			
Org. jed.	Broj	Priloga	Vrijednost
01	-02-	1357	122

**PARLAMENT FEDERACIJE BiH**  
**ZASTUPNIČKI DOM**  
n/r predsjedavajući Mirsad Zaimović

**PREDMET:** Amandman na Prijedlog Zakona o turizmu

U skladu sa članovima 184. i 185. Poslovnika Predstavničkog doma Parlamenta Federacije BiH ulažem amandmane na Prijedlog

**Zakona o turizmu**

### AMANDMAN I

**U članu 74. iza alineje b) dodaje se nova alineja c) koja glasi:**

„c) prihodi ostvareni od članskog doprinosa,“.

U istom stavu istog člana dosadašnje alineje c), d), e, i f) postaju alineje d), e), f) i g).

**U istom članu, iza stava (2) dodaje se novi stav (3) koji glasi:**

„(3) Prihodi iz stava (1) tačka c), reguliraju se zakonima kantona/županija“.

### Obrazloženje

Obzirom da se u slučaju turizma, kao privredne grane u Federaciji Bosne i Hercegovine, radi o zajedničkoj nadležnosti između Federacije BiH i kantona, prihod utvrđen kantonalnim zakonom (kao što je slučaj sa važećim Zakonom o turističkim zajednicama {„Službene novine Tuzlanskog kantona“ broj: 11/15 i 14/16} ne može se ukidati federalnim zakonom, bez saglasnosti kantona.

Pored toga, napominjem da Prijedlogom Zakona o turizmu u Federaciji BiH, federalna vlast predviđenim zakonskim rješenjima, turističke zajednice lišava najznačajnijeg prihoda, čime se dovodi u pitanje i opstanak ovih pravnih lica čiji je glavni zadatak i cilj - razvoj i unapređenje ove značajne privredne grane.

Dalje, kada se sagledaju sveukupna rješenja predviđena Prijedlogom, a vezana su za osnivanje i finansiranje turističkih zajednica, postavlja se pitanje kako će općine ili gradovi sa manjim budžetima, uspjeti finansirati rad ovih pravnih lica. To dalje vodi upitnosti

opstojnosti osnovanih turističkih zajednica na nivou jedinica lokalne samouprave, a s tim u vezi i rad na unapređenju ukupnog turističkog proizvoda. Time se upravo direktno utiče na nemogućnost održivosti ove, za Federaciju BiH i BiH, jedne od značajnijih privrednih grana i direktnoj ugroženosti radnih mjesta.

Mišljenja sam da članski doprinos treba postojati, upravo kao širi izvor finansiranja rada turističkih zajednica, a koji bi svakako bio podložan promjenama koje bi značile uspostavu modaliteta koji bi bio prihvatljiv za sve obveznike, i u skladu sa djelatnostima koje isti obavljaju.

Ovakvo zakonsko rješenje, sadržano u Prijedlogu Zakona o turizmu u FBiH, a koje se odnosi na ukidanje članskog doprinosa, vodi ka značajnom smanjenju aktivnosti, pa i gašenju turističkih zajednica, a koje imaju ključnu ulogu u razvoju i promociji turizma, i osnivaju se: „radi razvoja, unapređenja i promocije turizma u cjelini, i privrednih interesa pravnih i fizičkih lica koja pružaju ugostiteljske i druge turističke usluge ili obavljaju drugu djelatnost neposredno povezanu s turizmom, na način da upravljaju destinacijom na nivou za koji su osnovane“ (Zakon o turističkim zajednicama TK, Član 2., Ciljevi osnivanja turističkih zajednica)

Podsjećam da je Svjetska turistička organizacija Ujedinjenih naroda (UNWTO) u svojim dokumentima #Travel Tommorrow – Potpora očuvanju radnih mjesta i gospodarstvu kroz putovanja i turizam i Poziv na akciju za ublažavanje društveno-gospodarskog učinka COVID-19 i ubrzavanje oporavka, upravo daje zadatak nacionalnim vladama da na sve moguće načine podstaknu i ubrzaju oporavak ove značajne privredne grane.

Važeća zakonska regulativa u oblasti turizma u Republici Hrvatskoj, kao državi članici Evropske unije, koja prati Direktive EU i oslanjajući se na zakonska rješenja austrijskog i nizozemskog pravnog sistema, zadržava članski doprinos – članarinu, kao glavni izvor prihoda shodno Zakonu o članarinama u turističkim zajednicama – NN 52/19 i 144/20.

Isto tako, prema Zakonu o turističkim zajednicama i promicanju hrvatskog turizma NN 42/20, člankom 33. stav (4) i člankom 59., propisano je, između ostalog, da su prihodi turističkih zajednica: turistička pristojba i turistička članarina, sukladno posebnim propisima koji ovu kategoriju uređuju.

Nije teško zaključiti da predložena rješenja nisu povoljna i ne idu u korak sa ciljem održivog razvoja turizma u Federaciji BiH, obzirom da su, od stupanja na snagu Zakona o turističkim zajednicama Tuzlanskog kantona u 2015. godini, većina gradova i općina sa prostora Kantona osnovale svoje turističke zajednice, te se postavlja pitanje dostatnosti ostalih prihoda, koji, kako stvari stoje, neće biti dovoljni niti za tekuće poslovanje, a što dalje vodi ugroženosti mnogih radnih mjesta koja su na ovaj način otvorena. Prema tome, turističke zajednice na prostoru Tuzlanskog kantona gotovo da sigurno neće moći doprinijeti razvoju turizma u destinaciji.

s.r. Jasmina Zubić